

INUIT ATAQATIGIIT

INATSISARTUNI



UPA 2014/152

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Kalaallit Nunatsinni dialysertartut amerlanerit Nunatsinni dialysertarnissaat anguniarlugu iliuusissamut pilersaarummik sanaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Iliuusissanut pilersaarut saqqummiuteqquneqarpoq kingusinnerpaamik Inatsisartut 2015-mi upernaakkut ataatsimiinneranni.

(Inatsisartunut ilaasortaq Mimi Karlsen, Inuit Ataqatigiit)

Tunngavilersuut

Dialyse tassaasoq teknik atorlugu timip igitassartaanik paaaneq aammalu timip tarajuanik imeqarneranillu naligiissarineq. Tamanna nalinginnaasumik tartup suliarisaraluaraa pisariaqalertarpoq tartut arlaannik peqquutilimmik taama sulionnaaraangata.

Ajoraluartumik Nunatsinni dialysersinnaanngitsut Danmarkimi sivoorsuarmik najugaqartariaqartarput, tassani dialysertittaramik. Ilaatigut kalaaleqateqarpugut ukiut 5-17-it tikillugit kalaallit peqqissarfianni najugaqartinneqartunik Nunatsinni dialysersinnaannginnaannginneq peqquutigalugu. Tamanna nappaatip saniatigut inunnik artukkiivoq ilaquuttat nunarpullu qimalugu inuusariaqalernermik nassataqartoq.

Timikkut nappaateqalernerme Danmarkimiittariaqarneq nanertuutaasarpoq. Sulili nanertuutaaneruserpoq nammineq angerlarsimaffeqarani peqqissartut angerlarsimaffianni najugaqartitaasarneq.

Nunatsinni innarluutilinnut inatsiseqarpugut sapinngisamik innarluuteqartup inuunermut nalinginnaasumut qaninnerpaamik inuusinnaanissaa anguniarlugu ikiorsiisarluta. Tamannalu aamma dialysertartunut anguniartariaqarpoq.

Dialysertarnerit assigiinngitsut marluusut arlaat sorleq nunatsinni ingerlanneqarsinnaanersoq Naalakkersuisunit nalilerneqarnissaanut pilersaarummi ersersinneqarsinnaavoq. Inatsisartuni pingaartipparput sapinngisamik napparsimasortatta Nunarput, ilaquuttatillu qimanagit Nunatsinni nakorsartinnissaat aqutissiuuneqartuartaqartoq, soorlu ukiut ingerlaneranni kræfteqartut kemortittarnerat Nunatsinni ingerlanneqarsinnaanngorsimasoq, allatulli ajornaraangat Danmarkimi kemortittoqartariaqartarluni. Aamma dialysertarneq taama ingerlanneqarsinnaanngortariaqarpoq.

Nunatsinni dialysersinnaanerup aamma nassatarissavaa napparsimaveqarfinni dialysemut ilisimasanik peqalernerq, tamannalu tartuluttunut ilaqaataasunullu iluaqutaassaqaq.

Siunnersuutikkut angorusuppara nappaateqartut amerlanerit Nunatsinni ikiorsinnaaneqarnissaat, Nunatsinnilu napparsimaveqarfiup sullissinnaasaasa amerlissinneqarnissaat.

Inuit Ataqatigiinni neriuppugut amerlanerussuteqarluartut siunnersuut ilalerumaaraat.

Pisortanut aningaasaqarnikkut allaffissornikkullu kingunissai.
Suliniutissat pilersaarusernerat aningaasartuutitaqassaaq. Allaffissornikkut suliasatigut

suliassaq ukiumut AC-ip affap suliassaanik naleqarsinnaassasoq nalilerneqarpoq, tassa 250.000 kr-it missaannik naleqarsinnaassalluni.

Namminersorlutik inuussutissarsiortunut aningaasaqarnikkut allaffissornikkullu kingunissai.

Namminersorlutik inuussutissarsiortunut aningaasaqarnikkut allaffissornikkullu kinguneqassanngilaq.

Innuttaasunut aningaasaqarnikkut allaffissornikkullu kingunissai.

Innuttaasunut aningaasaqarnikkut allaffissornikkullu kinguneqassanngilaq.